

# FA'APEFEA ONA MAUA SE POLOA'IGA PUIPUIA MO LE SAUĀINA I AIGA

**Afai o e feagai nei ma se lamatia mata'utia, vala'au le 911.** E mafai fo'i ona e vala'au i le Laina Fesoasoani Sauāga i Aiga a le Mālo i le 1-800-799-SAFE (7233) ma le 1-800-787-3224 (TTY) po'o le tesi "start" i le 88788.

E maua ni punā'oa e fesoasoani ia te oe i le faiga o sau fuafuaga saogalemu i le initaneti, le faletusi, ma le fale sulufa'i mo ē sauāina i aiga ma feusua'iga fa'amalosi. Va'ai le <https://andvs.org/find-help/member-programs/> e maua ai punā'oa lotoifale mo sauāga i aiga ma nofoaga sulufa'i mo fa'ao'olima tau feusua'iga.

A iai ni au fesili pe mana'omia se fa'aliliu upu, fesili i le fale fa'amasino lotoifale mo se fesoasoani.

## O le a le Poloa'iga Puipuia mo le Sauāina i Aiga?

- O se poloa'iga puipuia e saini e se fa'amasino ma poloa'iina ai se tasi tagata ina ia fai pe 'aua le faia ni mea ina ia e saogalemu ai. Mo se fa'ata'ita'iga, o poloa'iga puipuia e masani ona ta'u i le isi tagata e nofo ese ma oe ma 'aua ne'i toe fa'afeso'ota'i atua oe.
- E mafai ona e failaina se talosaga i le fa'amasinoga e fesili ai mo se poloa'iga puipuia pe afai na faia se aga sauā i totonu o aiga e se tasi ia te oe. E mafai fo'i ona e failaina e fai ma sui o lau fanau po'o se tasi o lo'o avea oe mona tausitama fa'aletulafono.
- O lou fesili mo se poloa'iga puipuia e **Iē** tutusa ma ripotia o se solitulafono i leoleo. E iai lou aiā tatau e ripoti ai se soligatulafono i leoleo i so'o se taimi.
- O fa'atonuga nei e fa'amalamalama ai pe fa'afefea ona fesili mo se poloa'iga puipuia mo sauāga i totonu o aiga. E te maua nisi fa'amatalaga fa'aopoopo i le [ak-courts.info/pub22](http://ak-courts.info/pub22).

## E fa'afefea ona ou fesili i le fa'amasinoga mo se poloa'iga puipuia?

Pepa PDF Ono Fa'atumu

- Faila le Talosaga mo se Poloa'iga Puipuia mai le Sauāina i Aiga [*Petition for Domestic Violence Protective Order*]. Mo le tagata e to'atasi, fa'aaogā le [DV-100](#). Mo tagata e sili atu i le tasi (fa'ata'ita'iga, o oe ma lau fanau), fa'aaogā le [DV-100M](#).
- E maua uma pepa fa'atumu mo le sauāga i aiga mo le lautele i le [ak-courts.info/dvforms](http://ak-courts.info/dvforms).

Polokalama Initani Ta'ita'ia le Fa'atumu (Petition Wizard)

- E ese mai nai lou fa'atumuina sa'o o le pepa, e mafai ona e fa'aaogaina le *Petition Wizard*, o se polokalama i le initaneti e ta'ita'ia oe i le fa'atumuga o pepa. I le i'uga, e te maua se talosaga e mafai ona e failaina i le fa'amasinoga.
- E maua i luga o le initaneti i le [ak-courts.info/dvwizard](http://ak-courts.info/dvwizard).

## E fa'afefea ona ou fa'atumuina le talosaga?

**Tagata Talosaga.** O le "tagata talosaga" o le tagata o le a puipuia e le poloa'iga puipuia. Afai o lo'o e fa'atumuina le talosaga mo oe lava, o oe la o le tagata talosaga. Afai o lo'o e fa'atumuina le talosaga mo se tamaitiiti, o le tamaitiiti la le tagata talosaga. Tusi le igoa o le tamaitiiti, aso fanau, ma lou fāiā i le tamaitiiti.

**Tagata Tali Mai.** O le "tagata tali mai" o le tagata lea o lo'o e fesili e puipuia mai ai oe. E tatau ona e tu'uina mai le igoa muamua ma le fa'ai'u o le tagata tali mai, ma lona aso fanau pe afai e te iloa. Afai o le tagata tali mai o se tamaitiiti, e aogā le tu'uina mai o mātua o le tamaitiiti, tausitama, po'o le tagata o lo'o iai le matāfaioi fa'aletulafono mo le tamaitiiti.

**Numera Mataupu.** 'Aua le tusi i luga o le laina lea – e aumai e le aufaigaluega a le fa'amasinoga se numera ma latou fa'atumuina mo oe.

### **Ituaiga Poloaiga Puipuia E Mafai Ona E Talosaga ai.**

- **Poloa'iga Puipuia Pu'upu'u** (ta'ua fo'i o le poloa'iga "itu tasi") e te maua ai loa le puipuiga. E 20 aso e lelei ai vaganā ua fa'aumi e le fa'amasino. E mafai e le fa'amasino ona talia pe te'ena le talosaga e fa'avae i luga o mea e te tusia i le talosaga ma lau molimau i le iloiloga, pe a iai se iloiloga. E mafai e le fa'amasino ona tu'uina mai le poloa'iga puipuia lenei e aunoa ma le ta'uina i le tagata tali mai sa faila lau talosaga, ma e aunoa fo'i ma se tala mai le tagata tali mai. E te lē tau ta'ua i le tagata tali mai o lo'o e fesili mo se poloa'iga puipuia, ae afai na e fai i ai, siaki le pusa i luga o le pepa fa'atumu ma ta'u i le fa'amasino pe fa'afefea ona e taumafai e ta'u i le tagata tali mai o lo'o e fesili mo se poloa'iga puipuia.
- **Poloa'iga Puipuia Umi** e aogā mo le tausaga e tasi. Se'iloga e uma se iloiloga ona mafai lea e se fa'amasino ona tu'uina mai se poloa'iga umi. E tatau ona maua e le tagata tali mai e lē itiiti i le 10 aso le fa'aaliga o le iloiloga i le fa'amasinoga ma maua se avanoa e tautala ai i le iloiloga. Afai na maua e le tagata tali mai le fa'aaliga, ae filifili e lē sau i le iloiloga, e mafai lava e le fa'amasino ona talia le poloa'iga. O le matāfaioi a leoleo ma ofisa o le tulafono le logo o le tagata tali mai e uiga i le iloiloga.
- **Poloa'iga e Iua Pu'upu'u ma le Umi.** Afai e te mana'o i poloa'iga uma e lua, siaki uma pusa e lua i luga o lau talosaga. Afai na e talosagaina poloa'iga uma e lua, ae talia lau poloa'iga pu'upu'u, o le a fa'atulaga e le fa'amasinoga se iloiloga e mafai ai e le fa'amasino ona fai sana fa'ai'uga i le poloa'iga puipuia umi. E iai le avanoa o le tagata tali mai e 'auai i le iloiloga ma tete'e i le poloa'iga. Afai e te'ena le poloa'iga pu'upu'u, e ono fa'atulaga e le fa'amasinoga se iloiloga mo le poloa'iga umi, pe leai fo'i.

**Mafutaga i le va o le Tagata Talosaga ma le Tagata Tali Mai.** Ina ia maua se poloa'iga puipuia mo le sauāga i aiga, e tatau ona iai se ituaiga mafutaga a oulua ma le tagata tali mai. E iai le lisi o ituaiga mafutaga e agava'a i le itulau 5 o fa'atonuga nei. Siaki le pusa i le pepa e fetaui ma lau mafutaga. Afai e lē iai se tasi o na mafutaga, e te ono agava'a mo se Poloa'iga Puipuia mai le Feusua'i Fa'ao'olima po'o le Tulituliloa. Va'ai le Fa'atonuga mo le Talosagaina o se Poloa'iga Puipuia mai le Tulituliloa ma le Feusua'i Fa'ao'olima [*Instructions for Requesting a Protective Order against Stalking or Sexual Assault*] (pepa [CIV-751](#)) mo nisi fa'amatalaga fa'aopoopo.

**Fa'amatala le Sauāga i Aiga.** Ina ia tu'uina mai se poloa'iga puipuia, e tatau ona sa'ilii e le fa'amasino pe na tupu le solitulafono matuiā o le sauāga i aiga. E lē mana'omia lou iloa o igoa o soligatulafono ia po'o le ituaiga tonu na tupu ia te oe, ae mana'omia lou fa'amatala auiliili le mea na fai e le tagata tali mai ia te oe po'o lau fanau. Taumafai e aofia ai aso ma nofoaga pe afai ete manatua. E iai le lisi o soligatulafono sauāga i aiga o lo'o i le i'uga o fa'atonuga nei.

**Talosagaina Puipuiga.** I le aupito itiiti, o se poloa'iga puipuia e ta'u atu ai i le tagata tali mai e 'aua le faia le sauāga i aiga, tulituliloa, po'o le fa'asoesā ia te oe, po'o le fa'amata'u o le a fai. O le pepa talosaga o lo'o lisi mai ai ni fa'ata'ita'iga o nisi ituaiga puipuiga e mafai ona e talosaga ai. O nisi puipuiga na'o poloa'iga puipuia u'umi e maua ai. Mafaufau po'o lē fea e te lagona ai le saogalemu ma fa'ataga ai oe e fa'aaaua lou olaga. Afai e te mana'o e fesili i le fa'amasino e fa'atonu le tagata tali mai e totogi mea na fa'aleagaina mai le vevesi i le aiga, lisi auiliili uma mea e tatau ona totogi ma le aofa'i tonu o le tupe. Ia fa'amautinoa e aumai i le iloiloga umi ni fa'amaoniga o ia aofa'iga uma (pili tau ma'i, lisiti po'o fa'atatau o tau e toe sui ai meatotino ua fa'aleagaina, ma nisi).

**Tausiga o le Tamaitiiti ma le Lagolagoina o le Tamaitiiti.** Afaí e iai se lua fanau ma le tagata tali mai, e mafai ona e fesili i le fa'amasino e fai se poloa'iga lē tumau i le mea e nonofo ai tamaiti. Fa'amatalala auiliili po'o afea e te manatu e tatau ona aumai ai tamaiti ia te oe ae o afea e tatau ona iai tamaiti i le tagata tali mai, ma pe fa'afefea ona fesuia'i tamaiti i le lua va pe afai o lo'o iai se poloa'iga puipuia. E mafai fo'i ona e talosaga e totogi atu e le tagata tali mai ia te oe le tupe o le lagolagoina o tamaiti. Afaí e te fesili mo le lagolagoina o tamaiti, ave i le fa'amasino fa'amatalaga uma e mafai ona e maua e uiga i le tupe maua a le tagata tali mai. Taumafai e te sau ma aumai i le iloiloga umi ni kopi o lua lafoga ma ni ulu siaki a oulua uma ma le tagata tali mai.

**Fesoasoani mai le Fa'amalosi-Tulafono.** Afaí e te mana'omia le fesoasoani mai leoleo po'o ofisa o le tulafono e te toe fo'i ai i lou aiga, po'o le aumaia o au mea totino, fagafao, po'o tamaiti, fa'amatalala i le fa'amasino po'o ā mea e te mana'omia ai le fesoasoani.

**Fa'amatalaga e uiga i le Tagata Tali Mai.** O fa'amatalaga ia e fesoasoani i ali'i ofisa fa'amalosi tulafono e su'e le tagata tali mai ma ave iai se kopi o le poloa'iga puipuia ma le fa'aaliga e uiga i le iloiloga umi. Afaí e lē maua e ali'i ofisa fa'amalosi tulafono le tagata tali mai e fai iai lenei tautua, o le a lē mafai ona fa'amalosia le poloa'iga puipuia, e **matuā tāua** lou tu'uina mai o ni fa'amatalaga fa'apitoa uma e mafai ona maua. O le Pepa Fa'amatalaga Fa'alilolilo a le Vaega Fa'amalosi Tulafono [*Confidential Law Enforcement Information Sheet*] (pepa [DV-127](#)) o lo'o fa'apipi'i i le talosaga e te maua ai le avanoa e tu'uina mai ai nisi fa'amatalaga auiliili. Ia fa'amautinoa e te fa'atumuina fo'i le pepa DV-127 i le mae'a lelei e te mafaia.

**Fa'amatalaga e uiga i le Tagata Talosaga.** E tatau ona mafai ona feso'ota'i atu le fa'amasinoga ia te oe mo iloiloga ma ni pepa e fia tu'uina mai, e **matuā tāua** le tu'uina mai i le fa'amasinoga o le numera lelei o lau telefoni, o se imeli pe a iai, ma se tuātusi o le meli. Afaí e te talosagaina, e mafai ona tu'u nei fa'amatalaga i se teutusi fa'apitoa e na'o le aufaigaluega a le fa'amasinoga e avanoa ai,, ae le o le tagata tali mai. Afaí e te mana'o e tu'u fa'alilolilo ou fa'amatalaga feso'ota'i, fa'amatalala lena i le failautusi a le fa'amasinoga pe a faila lau talosaga.

**Saini ma Faila le Talosaga.** Saini lau talosaga i luma o se noteri po'o le failautusi a le fa'amasinoga. Afaí e leai se noteri po'o se failautusi a le fa'amasinoga o avanoa, saini le talosaga ma fa'apipi'i iai le Fa'amaonia e Oe Lava (Leai se Noteri Avanoa) [*Self-Certification (No Notary Available)*] (pepa [TF-835](#)). A e sainia le talosaga, o lo'o e tauto o mea uma ua e tusia i totonu e moni. Afaí e faila fa'aeleterone lau talosaga, sefe se kopi pe afai e mafai ona e faia lena ma le saogalemu. Afaí e te alu e faila lau talosaga, e fai e le failautusi a le fa'amasinoga se kopi mo oe, e te teuina pe a mafai ona e teuina saogalemu. E mafai ona faila lau talosaga i le imeli (fa'asino imeli:  
<https://courts.alaska.gov/courtdir/efiling.htm#featured-content-1>) po'o lou alu i le fa'amasinoga lotoifale. Afaí na'o le poloa'iga umi o lo'o e fesili ai, e mafai fo'i ona e lafoina i le meli i (lisi o tuātusi:  
<https://courts.alaska.gov/courtdir/index.htm>).

### **O le a le mea e tupu pe a uma ona faila la'u talosaga mo se poloa'iga puipuia?**

Mo talosaga mo poloa'iga puipuia pupu'u, e iloilolo vave e le fa'amasino, e masani ona fai i le aso lava na faila ai. E ono fai se iloiloga e le fa'amasino pe leai fo'i. E mafai ona e fesili i le failautusi a le fa'amasinoga po'o a alumaga masani. Sauni e fa'atali ma/po'o le fa'aavanoa mo le telefoni mo lau iloiloga mo ni itula pe a uma ona faila. Ona tu'uina mai lea e le fa'amasino le poloa'iga pe talia po'o le te'ena le poloa'iga puipuia.

Afaí na'o le poloa'iga puipuia umi na e talosagaina, e avatu e le failautusi o le fa'amasinoga ia te oe pe meli atu le fa'aaliga o le taimi o le iloiloga umi. E filifili le fa'amasino pe talia le poloa'iga pe a mae'a le iloiloga.

### **Fa'afefea pe a te'ena e le fa'amasino la'u talosaga mo se poloa'iga puipuia pu'upu'u?**

E leai se mea e fa'ataunu'uina o mea uma na e talosagaina. I se tasi fa'aupuga, e fa'aauau lava mea uma e pei e le'i failaina sau talosaga. Afai na e talosagaina se pologa'iga puipuia umi, e ono fa'atulaga e le fa'amasinoga se iloiloga (masani lava i totonu o le 2-3 vайасо) e fa'alologolo ai ia te oulua ma le tagata tali mai pe tatau ona tu'uina atu le poloa'iga puipuia umi pe leai.

### **Fa'afefea pe a talia e le fa'amasino la'u talosaga mo se poloa'iga puipuia pu'upu'u?**

**Fesoasoani mai le Fa'amalosi Tulafono.** Afai e fa'atonuina e le fa'amasino leoleo po'o ali'i o le mālo e fesoasoani e fa'amalosi le poloa'iga (mo se fa'ata'ita'iga, e fesoasoani ia te oe e aumai meatotino poo tamaiti), faafeso'ota'i le 'au faamalosi tulafono i lou lotoifale e fa'atulaga le mea lena.

**Tautua i le Tagata Tali Mai.** O le a fa'aiola loa e le fa'amasinoga i ē fa'amalosi tulafono e uiga i le poloa'iga puipuia ina ia taumafai i latou e ave se kopi i le tagata tali mai. O le mea lea e ta'u o le "fa'ao'o" le poloa'iga puipuia. O se leoleo, ali'i o le mālo, po'o se VPSO e ona le matāfaioi o le fa'ao'o i le tagata tali mai le poloa'iga puipuia. Afai e te fia iloa pe na fa'ao'o le poloa'iga, e mafai ona e vala'au i le numera lē fa'afuse'i mo fa'amalosi tulafono po'o le siaki le CourtView (e ono o'o i le 72 itula e fa'afou ai nei fa'amatalaga i le CourtView). **Aua le fa'ao'o i le tagata tali mai e oe lava.** E ono tugā lenei mo oe, ma e lē talia o se tautua fa'letulafono. Fa'ato'a mafai ona fa'amalosia le poloa'iga pe a fa'ao'o e le 'au fa'amalosi tulafono.

**Soli le Poloa'iga Puipuia.** E uma loa ona fa'ao'o le poloa'iga i le tagata tali mai, e ono avea ma solitulafono pe afai e soli e le tagata tali mai. Ripoti ni soliga o le poloa'iga puipuia i tagata fa'amalosi tulafono o le lotoifale.

**Iloitoga i le Lumana'i.** Afai na e fesili mo se poloa'iga puipuia umi, o le a fa'atulaga e le fa'amasinoga se iloiloga e fa'alogo ai iā oulua uma ma le tagata tali mai pe talia le poloa'iga umi pe leai. Afai e te lē mautinoa po'o afea e fai ai lau iloiloga, vala'au i le fale fa'amasino e fesili iai.

**Suiga, Fa'aumiumi, po'o Fa'amuta se Poloa'iga Puipuia.** A uma ona tu'uina mai e le fa'amasino le poloa'iga puipuia, e mafai ona e fesili i le fa'amasino e:

- sui (fetu'una'i) le poloa'oiga. Fa'aaogā le Talosaga e Fetu'una'i le Poloa'iga Puipuia [*Request to Modify Protective Order*] (pepa [DV-131](#) po'o [DV-131M](#)).
- fa'aauau (fa'aumiumi) se poloa'iga uma. Fa'aaogā le Talosaga e Fa'aumiumi le Poloa'iga Puipuia Umi [*Request to Extend Long-Term Protective Order*] (pepa [DV-132](#) or [DV-132M](#))
- fa'auma (fa'amuta) le poloa'iga. Fa'aaogā le Talosaga e Fa'amuta le Poloa'iga Puipuia [*Request to Dissolve Protective Order*] (pepa [DV-133](#) or [DV-133M](#))

O nei pepa fa'atumu e maua kopi pepa I le ofisa o le failautusi a le fa'amasinoga, ma e maua fo'I I lugia o le initaneti I le [ak-courts.info/dvforms](http://ak-courts.info/dvforms).

## **SOLIGATULAFONO E A'AFIA AI LE SAUĀGA I AIGA**

### **Ina ia agava'a o se solitulafono tau sauāga i aiga:**

- E tatau ona faia pe fuafua se soligatulafono; ma
- O le solitulafono e tatau ona faia e se tagata o le aiga lea aga'I I se se isi tagata o le aiga lava lea; ma
- O le solitulafono e tatau ona iai I le lisi o solitulafono I le settee o a Alaska, po'o se soiliga o se tulafono uiga fa'atasi a se isi nu'u po'o se setete.

### **O le uiga o "tagata o le aiga" i lalo o tulafono tau sauāga i aiga a Alaska:**

(1) Tagata matutua po'o tamaiti e lāvea i se tasi o mea nei po'o le tele atu fo'i:

- to'alua i le taimi nei po'o se taimi ua te'a
- nonofo fa'atasi pe sa nonofo fa'atasi i le taimi ua tuana'i
- o lo'o fai se mafutaga fa'aleuō pe feusua'i (pe sa fa'apena i le taimi tuana'i)
- e aiga i le toto po'o se tamafai e o'o i le "fa augātupulaga le so'otaga"
- e aiga pe sa aiga e ala i le fa'aipoipoga
- e iai se la tama fa'atasi

(2) Fanau laiti a se tagata e lāvea i so'o se mafutaga o tā'ua i le vaega (1).

### **Lisi o solitulafono e agava'a mo se poloa'iga puipuia o sauāga i aiga:**

**Fa'ao'olima** o le fa'amana'alia o le tino o se isi e se tasi tagata, po'o le fa'amata'u e se isi o le ana fa'amana'aina se tasi tagata ma ono fa'ataunu'u loa lena folafolaga. Afai na iai se fa'amata'u, e ono mafai ona maua sau poloa'iga puipuia tusa pe le'i manu'a lou tino i le tagata tali mai.

**Susunu Meatotino po'o Solitulafono Mu Fa'atamala** o le fa'aleagaina e se isi ni meatotino a se tasi tagata e ala i le amata o se afi po'o se fa'apa salalau. O le susunu meatotino fo'i le fa'aleaga o au lava meatotino i se afi po'o le fa'apa salalau pe afai e lamatia ai se isi tagata ma ono manu'a tigaina ai.

**Ulufale e gaoi** pe a ulufale ma tumau ai totolu o se fale e lē tusa ma le tulafono ma le fa'amoemoe e fai se solitulafono i totolu o le fale.

**Ulavale solitulafono** pe a fa'aleaga fa'amoemoeina e se isi meatotino a se tasi tagata. O le ulavale solitulafono fo'i le fa'aleagaina o ni mea totino e aiā tutusa i ai lē **na** fa'aleagaina ia meatotino.

**Sopotuāoi solitulafono** pe a ulu se tagata pe tumau ai i luga o se fanua, totolu o se fale, po'o totolu o se ta'avale e lē tusa ma le tulafono.

**Agaleaga i fagafao** pe a fai ma le iloa le fa'amana'a pe tapē se meaola o se fagafao, ma le fa'amoemoe e fa'apopole, fa'amata'u, pe fa'afefe se isi tagata.

**Soso'i tu'utu'uga o le tausiga** pe a ave ma taofi e se tagata o se aiga se tamaitiiti e aunoa ma se aiā tatau fa'alekulafono, **ma** e fa'amoemoe lea tagata e taofi le tamaitiiti mai le tausitama fa'alekulafono mo se taimi umi. O se fa'ata'ita'iga o se mātua e te aveesea se tamaitiiti mai se setete ina ia taofia ai mai le isi mātua mo se taimi umi, ae leai sona aiā fa'alekulafono e fai ai lea mea. E **lē** o se soso'i tu'utu'uga o le tausiga pe a lē fa'afaoi maia e le mātua le tamaitiiti i le taimi na malilie ai.

**Ave fa'amalosi ma fa'amata'u** o solitulafono e ta'ua fa'alaua'itele o le "fa'afefe mo se taui." E a'afia ai se isi e fa'amata'u o le a fa'amana'a po o se isi ituaiga lamatia ina ia maua meatotino a se isi, po'o le fa'amalosi o se isi e fai se mea e lē loto i ai. O le fa'ata'ita'iga o se isi e fa'afefe atu oe o le a fa'ailoa se mea matagā e uiga ia te oe i luga o le initaneti vaganā ua e avatua se tipe.

**Fa'asoesā** pe a fa'apena se isi ma le fa'amoemoe e fa'alavelave pe fa'apopole se isi tagata:

- vala'au i le telefoni ma lē tapunia, ina ia le mafai ai e le isi tagata ona vili nisi pe vala'au mai fo'i nisi; po'o
- vala'au mai fa'afia i le telefoni i itula lē talafeagai; po'o
- vala'au mai po'o le fai o feso'ota'iga fa'aeleterone e lē iloa ai ia po'o le masoā, pe fa'amata'u mai le fa'amanu'alia o le tino po'o le feso'ota'iga tau feusua'iga; po'o
- lolomi ma fa'asalalau ata, po'o ni vitiō e fa'aali mai ai totoga sa o le isi tagata, muli, po'o susu o fafine, po'o fa'aali mai ai le isi tagata o lo'o fai feusua'iga.

**Ave fa'anana** pe a taofi se isi tagata ae lē loto i ai. E masani, ua fa'amoemoe le tagata lea e fa'ao'olima i le tino pe feusua'i ma le isi tagata, e tupu ai se lamatiaga matuiā e i'u ina manu'a tigaina ai le isi tagata, po'o le nanā o le isi tagata ina ia lē toe maua.

**Lamatia fa'avalevaleda** pe a tupu se lamatia tetele po'o se manu'a matuiā i se isi ona o le amio po'o aga a se tasi tagata. O se fa'ata'ita'iga pe afai o lo'o uli lau ta'avale i luga o le alatele, ae fa'afuase'i ona tago mai le pasese i le foeuli, ma taumafai e fa'amalosi ese oe ma le auala ma foliga mai o le a tupu se fa'alavelave matuiā i le ta'avale.

**Gaoiga** pe a fa'aaogā le malosi, pe fa'amata'u o le a fa'aaogā le malosi, e ave ai tupe po'o ni meatotino mai se isi tagata. O le tupe po'o meatotino e tatau ona iai i le tagata lea pe latalata ane iai i le taimi e fa'aaogā ai le malosi po'o le taimi e fa'amata'u ai.

**Solitulafono tau feusua'iga** e aofia ai uma ituaiga feusua'iga ma le fa'ao'olima, feusua'iga faileaga o se tamaitiiti, feusua'i ma ē aiga, ma le telenoa. O le feusua'i fa'ao'olima e mafai ona tupu tusa pe fa'aipoipo tagata 'auai. E aofia ai solitulafono e a'afia ai ata lomia o itutino sa ma feusua'iga ma tamaiti, a'o isi solitulafono e feso'ota'i ma ata lomia tau feusua'iga e masani ona lē aofia ai.

**Tulituliloa** pe a faifapea le fa'afeso'ota'i o le isi tagata e aunoa ma le malie iai o le tagata lena, **ma** o feso'ota'iga e ono tupu ai le fefe o le isi tagata ne'i fa'amanu'alia lona tino po'o le otu.

**Fa'amata'u fa'aterorisi** pe a ta'u e se isi o lo'o iai se tulaga e lamatia ai le ola o se tasi tagata ma tupu ai le fefe ma le popole ne'i lavea. O se fa'ata'ita'iga pe a vala'au mai ia te oe i le telefoni ma fa'amata'u mai e fana oe pe a e aluese ma le fale. O le solitulafono fo'i pe a aveese tagata mai se fale po'o nisi tulaga matuiā e lē nofo lelei ai se vaega o ni tagata, ona o le fa'amata'u.

**Solia se poloa'iga puipuia** pe a fai e se isi se mea ua fa'asaina e 'aua le faia mai se poloa'iga puipuia o sauāga i aiga, tulituliloa, po'o le feusua'i ma le fa'ao'olima.

### **E fa'afefea pe afai e le lisi maia le solitulafono lea na fai iā te a'u po'o la'u tama la'itiiti?**

Afai e le o lisi atua i luga le solitulafono na fai, e mana'omia lou sa'ilii o se mapusaga i se isi auala. O solitulafono o lo'o mulimuli mai e lē manatu o ni solitulafono o sauāga i aiga mo le fa'amoemoe e maua ai se poloa'iga puipuia:

- Gaoi
- Saini pepelo
- Fa'aaogā fualau fa'asaina ma ava malosi
- Tu'ulafoa'i Tamaiti
- Soli poloa'iga a le fa'amasinoga (vagana poloa'iga puipuia), aofia ai le tausiga, asiasiga, ma poloa'iga lagolago
- Taufa'aleaga
- Fa'afefe o le a su pe ripoti i leoleo po'o nisi ofisa o le mālo